

х1янчурбачил ва ил шайчирти бек1лидиубти бях1чибизуначил урга даражала чедирти классунала дурх1ни тянишли биэс г1яг1нити саби. Ишди программабани ил т1алабра цабут1аван гьалабирхули саби.

Дарган мезла дахъал диалектуни ва лугъатуни лерни г1ячихъси саби. Дурх1нала дахъалгъунти хат1абира илди лугъатунала хьулчиличир алк1ули дирар. Илбагъандан программабазиб пикри бях1чиули саби дарган мезла диалектунала ва лугъатунала х1екълизирра дурх1нала белгити багъудлуми диахъниличи.

Дарган мезла дурсрачиб дурх1нала творчестволаси бях1чибиз биахънира, ишди программаби х1ясибли, лайикъсили чебиули саби. Илбагъандан халкъла мух1лила произведениеби (хабурти, далуйти, буралаби, багъираби, фразеологизмаби) дурчниличи, дек1ар-дек1арти поэтунала ва писательтала лук1нила стильти белгидирниличи, лугъатуначилаимц1али т1инт1ти баянти дурчниличи дурх1нала пикри бит1ак1ни къулайсилизи халбирули саби.

Ишди программабани халаси пикри бях1чиули саби практический х1янчурбачи, чузирра вархъли лук1нила, гъайик1нила, багълабирнила ишараби кадалтнила масъулти имц1али мурхъли ва гъат1ира чедетаахъили ирзути.

Программала гъарил тема к1ел бут1ализибад цалабикибси саби. Цаибил бут1ализиб чебаахъили саби, делч1унтира цазаманализир тикрардирули, теориялашалти багъудлуми мурхъдарес ва т1инт1дарес. К1иибил бут1ализиб практикалашалти устадеш чеахъдик1ахъес ибси масъала т1ашбалтули саби.

Вец1ъибил класслизир дек1ар-дек1арти темабас 26 сяг1ят чедаахъили сари. Калунтазирад 6 сяг1ят белк1ла х1янчурбас (сочинениябас, изложениебас, диктантунас) харждирути сари, 6 сяг1ят ил мурадлис литературализирадра кайсути сари.

Чидни-биалра темаби къияндулхъули диалли, тикрардирнилис чедаахъибти сяг1ятуни учительли къияндулхъути темабас яра белк1ла пайдаладарес вирар.

Тяп илкъяйда учительла ихтиюртазир далтули сари 11 ибил класслизирра тикрардарнилис чедаахъибти сяг1ятуни.